



Broj: 04-04-4-1087/25
Sarajevo, 28. 3. 2025. godine

SAOPĆENJE ZA JAVNOST O OBJAVLJENOM IZVJEŠTAJU REVIZIJE UČINKA „UPRAVLJANJE OTPADOM OD ELEKTRIČNIH I ELEKTRONSKIH PROIZVODA“

Ured za reviziju institucija u Federaciji Bosne i Hercegovine proveo je reviziju učinka „Upravljanje otpadom od električnih i elektronskih proizvoda“, s ciljem da ispita da li su nadležne institucije poduzele potrebne aktivnosti kako bi se osiguralo učinkovito upravljanje ovom vrstom otpada.

Revizijom su obuhvaćene aktivnosti Federalnog ministarstva okoliša i turizma, Fonda za zaštitu okoliša FBiH, Federalne uprave za inspeksijske poslove, kantonalnih ministarstava nadležnih za oblast zaštite okoliša i nadležnih inspekcija iz Kantona Sarajevo, Hercegovačko-neretvanskog, Zeničko-dobojskog i Unsko-sanskog kantona, poduzete u periodu 2021–2023. godine.

Rezultati revizije ukazuju na potrebu za dodatnim aktivnostima nadležnih institucija kako bi se osiguralo učinkovito upravljanje otpadom od električnih i elektronskih proizvoda, te zbrinjavanje većih količina ove vrste otpada.

Iako su propisi koji uređuju ovu oblast više puta mijenjani, **pojedina ključna pitanja i dalje nisu dovoljno jasno propisana.** Definisani ciljevi zbrinjavanja ove vrste otpada **značajno su niži od onih koji su utvrđeni u relevantnim evropskim direktivama.** Navedeno se negativno odražava na količine prikupljenog i zbrinutog EE otpada koje su u prosjeku niže u odnosu na većinu zemalja u okruženju. **Strateški i planski dokumenti za upravljanje otpadom na nivou FBiH i kantona nisu blagovremeno doneseni,** što uzrokuje kašnjenje u planiranju i realizaciji konkretnih mjera za unapređenje.

Inspeksijski nadzor koji se provodio u prethodnim godinama nije bio dovoljan za blagovremeno otkrivanje nepravilnosti i poduzimanje korektivnih aktivnosti. Zbog nekvalitetne kaznene politike nepoštovanje propisa u proteklom periodu nije adekvatno sankcionisano.

Informacioni sistem upravljanja otpadom **i dalje ne pruža pouzdane pokazatelje o stvarnim količinama plasiranih, prikupljenih i zbrinutih količina otpada.** Nadležni organi i institucije nisu na adekvatan način provjeravali i poredili podatke iz sistema s podacima drugih relevantnih institucija radi poduzimanja korektivnih radnji.

Podaci prezentirani u Izvještaju predstavljaju kvalitetan osnov za preispitivanje dosadašnjih praksi u ovoj oblasti. Za rješavanje ustanovljenih problema potrebno je učešće svih nadležnih institucija, s naglaskom na adekvatne izmjene i dopune propisa, jačanje rada inspeksijskih organa i unapređenje kontrolnih mehanizama i sistema izvještavanja.

Unapređenjem funkcionisanja sistema upravljanja otpadom od električnih i elektronskih proizvoda **moguće je ostvariti značajnu dodanu vrijednost koja se ogleda u smanjenju otpada na odlagalištima, te boljoj zaštiti okoliša i zdravlja stanovništva.**

Izvještaj revizije učinka dostupan je na internet stranici Ureda za reviziju: www.vrifbih.ba.



GENERALNI REVIZOR

Mirza Kudić